

Aruba ta conta cu hogar pa cachonan y pushinan bandona



ORANJESTAD(AAN) -- Pa mas cu 17 luna caba Aruba Animal Shelter Stichting tin un asilo situa banda di Servicio Veterinario.

E asilo, cu ta bao di auspicio di e veterinarianan dr. Wools y dr. van der Hoeven, ta recoge y cuida cachos, pushi y tin ora hasta otro animal cu no tin cas.

Bestiaran cu no por keda mas na e cas caminda nan a nace of cu ta pariba pabao ariba caya, por haya cuminda, medicamento y otro cuida na e asilo, te ora cu busca un hogar pa nan.

E bestianan aki ademas ta haya hangua di manera cu ta evita cu nan, na nan turno ta haya chikito. Di e manera aki Aruba Animal Shelter Stichting kier contribui na mantene e

populacion di bestia bao di control.

Esaki ta e meta mas grandi di e asilo y Aruba Animal Shelter Stichting, esta logra cu algun dia Aruba por ta limpi di bestianan no desea cu ta cana rond, sin cuida, molestiando hende y den algun caso, hasta ataca hende.

Tabata na October 1986 cu sra. Julie Horngard a funda Aruba Animal Shelter Stichting.

Como extranhera cu tin un cas na Aruba caminda e ta pasa un temporada grandi di siman, sra. Horngard constantemente tabata mira cachos y pushi ta cana den caya y den vecindario di hotelnan y tabata bestianan cu no tabata tin hogar.

Poco poco sra. Horngard

tabata recoge pushinan abandonado y tabata hiba nan su cas caminda nan por a haya cuida y un hogar.

E cantidad di animalnan a sigui crece y ya no tabata posible pa cuida mas cachos cu pushi na su cas.

Na mesun momento nan tabata tende constantemente keho di turistanan cu no por compronde con hendenan por tira e bestianan aki ariba y laga nan bandona.


Varios turista tabata bisa cu e bestianan bandona tabata motibo pa nan no regresa Aruba pa vacacion. Despues di a observa e situacion y nota cu despues di 20 aña di parti di instancianan Arubano nada a worde haci pa e pover bestianan, sra. Horngard a dicidi pa, cu apoyo di su casa lanta e Aruba Animal Shelter Stichting.

Cu ayudo di voluntarionan a cuminsa campananan pa recauda fondo pa por construi e asilo caminda e bestianan por haya cuida te ora cu nan worde adopta pa familianan cu ta desea un animal na cas.

No tabata facil y te ainda ta dificil pa recauda fondo pa traha e asilo y cubri e gastonan di cuida di e bestia. A pesar cu hotelnan tabata haya hopi keho di turista, poco na principio tabata dispuesto pa coopera. Cartanan a bay pa comerciantenan y hotelero y diferente otro instancia na Aruba pa por a logra e asilo.

Despues di hopi esfuerzo a logra recauda suficiente fondo pa por traha e asilo, cu a habri su portanan na Augustus 1987. Aruba Animal Shelter Stichting ta traha cu voluntarionan cu a logra organiza bingo y venta di t-shirt. Constantemente ta purba bende t-shirt ya cu e gastonan envolvi pa cuida di e be-

Sigui lesa pag. 12



Aruba ta conta *Cont pag.5*

stianan ta hopi ya cu tin un gran cantidad di bestianan abandonada.

Ademas tin di nan cu malesa y otro nan moribundo cu e asilo ta trata na recoge.

Un otro servicio voluntario cu sra. Horngrad di Aruba Animal Shelter Stichting ta duna, ta pa mostra turistanan rabia cu a skirbi carta, cu SI tin algo ta worde haci pa combati e bestianan cu ta cana rond sin hogar.

Di AHATA sra. Horngrad a haya e cartanan y esunnan cu tin adres na Merca e ta manda nan tur informacion di e asilo, bumper sticker y t-shirt, mustrando asina cu algo ta worde haci, pero cu mester di hopi esfuerzo y contribucion.

Hopi ta esnan cu ta reacciona cu un alivio y ta duna consejo y tin ora contribucion.

Recientemente un sra. Americano cu ta envolvi den un shelter na Merca y tabata hospeda na Divi Hotels, sra.

Kayne a tende di e asilo na Aruba y a tuma contacto cu sra. Horngrad.

Despues di a tende di e trabao di Aruba Animal Shelter Stichting sra. Kayne ariba su mes a pasa na e bazar na Tamarijn Beach hotel y a bende un cantidad grandi di t-shirt di e asilo cu turistanan.

Tin otro casonan caminda turistanan a bin den contacto cu e asilo y a adopta cacho of pushi y hiba nan Merca cu nan. A pedar di tur e esfuerzo di Aruba Animal Shelter y voluntarionan no ta tur ora cos ta bay positivo.

Entre otro tin caso caminda turistanan ta yama warda di Polis pa avisa cu tin un cacho bandona ta cana rond y reaccion cu nan ta haya ta sea cu "no por haci nada" of loke ta mas peor "cu lo manda un agente pa liquida e cacho dilanti di e turistanan".

Un comerciante cu a yama pa un cacho cu ta molestie den su lugar tambe ta tende cu si e ta "mind" pa agentenan liquida e cacho den su negoshi.

Reaccionnan asina ta spanta turista y esnan cu ta stima bestia.

Tin turista cu a yama bisa cu na Natural Bridge tin cachonan

brabo ta cana rond bandona y cu nan por ataca hende cu ta bay goza di naturaleza.

En vez di pasa e informacion pa e veterinarianan of duna cualkier excuus y keda keto, e turistanan ta tende di Polis cu nan no ta bay e kugar indica pasobra nan tin miedo pa nan worde mordi.

E turistanan aki jamas y nunca lo bolbe Aruba.

Sra. Norngard a splica cu e ta compronde cu un situacion cu a bay for di man pa tanto aña, dificilmente por worde solucionada den un of dos aña, pero cu cooperacion di un y tur por yega basta leu.

Un apelacion ta bay na tur hende cu tin bestia y no kier tin puppies, pa laga injecta of sterilisa e cacho of pushi, pero no laga nan haya yiu pa despues tira nan pa nan cuenta ariba caya.

Esaki sin duda ningun no ta bon pa salubridad y seguridad ni di nos mes hende, ni di turista.

Un cacho cu e malesa "rabies" cu morde un turista por perjudica seriamente e industria turistico.

Mester tene Aruba limpi di cachonan bandona of moribundo.